



फिलिप्पीरालाई

पावलए परींद ओरायो चिथी

आव चिथी फिलिप्पी मन्दलीलाई पावलए भयालखानानी परींद ओरायो ज़ (फिलिप्पी १:१३)। फिलिप्पीराए यादैज़्याव दुखराल थ०रिउर घतारक लिद यायुँर सभेःद ओराएज़्याव (१:२७-३०)। या मनी पावलए उदुखराल पोंखारिद धुरिद याएज़्यावए पावलए उयुँर होलाँ ताद रेंव ज़ उलिज़्याव (१:३-५; ४:१०-१६)। फरी ख्रीस किताव उसज़िम्सिउ, हिताव ज़ नोराए मनी ओदोरक लिन्या सतैसिउ लिज़्या (२:१-११)। बलेःज़्याव पाँरानी ब जोगोइद ओरानैज़्याव (३:१-२,१८-१६)।

१ गिन येसु ख्रीसए ओयेन दो-ज्याव ओनोकोरनी पावल सोनो तिमोथीनी गिन्ल्योनी, जे फिलिप्पी-लाव येसु ख्रीसए छैव उमींर सोनो जेलोम्बार जेस्रेरालाई आव चिथी परींद गिन्याचिज़्या। २परमेस्वर गेबाबु सोनो गेप्रभु येसु ख्रीसनी जेल्योदा नियुँ गराँद जेयुँ होलाँ जैद ओयाचिरक।

जेलाई रेंद डायुँ हबो ज़ लिज़्या

३डा जेलाई डाचेतैचिउ पती परमेस्वरलाई धन्याबाद चरैःद,

४जेजूनी परमेस्वरलाई डापोंखारिक एकतार रेंद ज़ डापोंखारिज़्या। ५काराव ल्यो ताकिन जे जेयुँ उहुबो छचामकिन ज़ परमेस्वरए चाव ओथा डारासथैक डालाई प्राइँनी ज़ जेसघैनाके। ६आव तोबो पाँत डायुँ हुपुद ले — परमेस्वरए जेयुँलाव थूद ओनैज़्याव चाव ओयेन भरी येसु ख्रीस फरी उहुन्या छचाम सयोःद तुपैदचान्या ले। ७जे डालाई जेसघैनाज़्यावए जेगुनर डा खर्क ज़ मामेंःन्या ज़्यासो लिज़्या।



डा भयालखानाल डालिज्याक ब, पाखात डालिज्याक ब, परमेस्वरए चाव ओथा डारासथैज्याक परमेस्वरए उयुं ओयालोनी ज़ जे मनी डादैव येनत डास सिप जेदोव मिताव ज़ ताके। ८डा जेस खर्क गेदैसिके लिद येसु ख्रीसए ओमयानी डायुं थू डाजैज्याव परमेस्वर साची लिज्या।

पावलए पोंखारिद ओरायो

६जेजूनी परमेस्वरलाई डापोंखारिक, 'या याल तयुं ताद भन ज़ ओखैनारक' लिद पोंखारिउ ज़ डानैज्या। नो जेखैज्याव अइज़ माःक, परमेस्वर किताव उलिज्याव लिद सरेस्द, चाव माचाव छुतैद खैच्यो। १०हो ताकिन ची चाव पाँ भरी थःरैद ख्रीस उहुक जेखत माल्यो छैवर तान्या जेले। ११येसु ख्रीसनी ताज्याव चाव येन भरी जेक्याँत भन ज़ ओरैःनाक। ननी ज़ परमेस्वरलाई ज़गै मगैव ताद उमिन ब भन ज़ घ्योःन्या ले।

पावल भयालखानाल

१२अ डानें डामेंर, डाक्याँत ताव माचावरानी चाव था भन ज़ थास्नाके। १३डालाई ख्रीसए ओयेननी भयालखानाल याभाःनाव दरबारलाव सिपाई भरी सोनो छुत मिंराए ब थैद नैर। १४इताव डासहिज्यावनी फरी

उपुर्काव गेदाज्यु भाइराए मनी प्रभुए ओल्योदा यायुं भन ज़ सुहुप्द ओपाँ माछेःद ज़ यारासथैज्यार। १५ख्वा ख्वाराए ते यामी जाँ तूद डाकिन सघ्योःसिन्याए जूनी ख्रीसए ओपाँ यारासथैज्यार। ख्वाराए ते सोजोनी ज़ यारासथैज्यार। १६नो सोजोनी सथैज्यावराए, 'चाव था सथैन्यात पावल खतैसिउ लिज्या' लिन्या सैद डालाई मया दाद ज़ दोज्यार। १७नो ख्रीसए ओपाँलाई तँनी सथैज्यावराए ते छैव युंनी माःक, भयालखानाल डालिज्याक भन डायुं सुहुदर्चान्याए जूनी यातिर वाज़ दोज्यार। १८हैदी ब ख्रीसए ओपाँ जो मितावनी यारासथैदी ब डायुं माचाव मादोव, रेंव ज़ डालिज्या। सोजोनी तादी ब, सघ्योःसिन्यानी तादी ब, ख्रीसए उमिन ओथास्किन, हो ज़ प्राइरानी घेप्पा लिज्या।

पावलए उयुं नेथोदा ओजैव

हैज़, डा रेंव ज़ लिन्या डाले। १९काराव ल्यो ताकिन जे डाजूनी पोंखारिद जेयाँज्यावए सोनो येसु ख्रीसए उपुरूसए ब डालाई ओसघैना-ज्यावए डा तछा आनी पुलुसुन्या ज़ डाले है डालिज्या। २०हैदी ब आव तोबो पाँत वाज़ डायुं थू ताद आस डादोज्या — डा कातानी ब लाज

मोनो डामाताक लिद आथ पाला मनी एकतारकाव डादोज्याव मिताव माछे-द ज़ डादोधुक। हो ताकिन ची डाबाँचिदी ब, डासिदी ब, ख्रीसए उमिन डाक्याँत घयोःन्या ले। २१ डाबाँचिदी ब ख्रीसए जूनी ज़ डाबाँचिज्या। डासिदी ब डालाई भन पाथ ज़ लिज्या। २२ खाली आव डाक्याँत जाँवा पै लिद ओयेन दाव डादैकिन हो ब चाव ज़ लिज्या। आव नेब्लोनी काताकाव रूजिन्या डा डामासैए। २३ डायुँ नेथोदा ज़ लिज्या। आव मानुवात लिज्यावकिन ख्रीसए ल्योदा बान्या डायुँ लिज्या, नदा बान्या पाथ लिज्या। २४ खाली जे जेजूनी डा आव मानुवात लिन्या ओचाहित लिज्या। २५ नो पाँ डा पक्का डासैज्या। डालिकिन जेलाई पाथ पारैद परमेस्वरलाई जेयुँ हुण्ण्यात भन ज़ रेंद लिन्या डाजैचिरिज्या। २६ हो ताकिन डा जेल्योक फरी डाहुक जे येसु ख्रीसए डाक्याँताव ओदोव रेंद जेसुनी भन ज़ च्याँःसिन्या ले।

परमेस्वरए ओपाँत दुख सहिन्या

२७ खाली जे ख्रीसए ओपाँत लिज्याव-रालाई उसहिज्याव मिताव दोच्यो। हो ताकिन ची जेल्योक हुद डामीए डारेंदी ब, आनी जेल्योक हुव डामादैदी ब, 'परमेस्वरए ओपाँत यायुँ हुण्ड तयुँ जैद

थ०रिद लेर दी' लिन्या थैन्या डाले। २८ सोनो, 'याखिरी पसिज्यावरालाई रेंद माछे-द परमेस्वरए ओपाँत जूनी धामा दाव ज़ नैज्यार दी' लिन्या ब थैन्या डाले। नो खिरी यापसिज्यावत नेथो सरेस लिज्या — खिरी पसिज्याव-रालाई परमेस्वरनिकाव सजा दैन्या सरेस लिज्या, जे मिताव सहिज्याव-रालाई फरी परमेस्वरनी बाँचिन्या सरेस लिज्या। २९ ख्रीसलाई युँ हुण्ण्या वाज़ माःक, जेलाई होए उजूनी दुख सहिन्या असिक ब याद नैचिउ। ३० आव डादुखल जे ब डास ज़ जेलिज्या। नो डादुखर डादाकिन ब जेरेंःज्याव, आज्याल मनी जेथैज्या।

तयुँ जैद खैद लिन्या

२ जे ख्रीसस तोबो ताद जेयुँर भेंद उलिकिन, जेल्योदा उयुँ ओभाःज्यावनी जेस०र होलाँ ओताव ताकिन, जेस छैव पुरूस उलिज्याव जेदासिउ ताकिन, जे जेल युँ नान्या उलिकिन, २ जे जेल तोबो युँ तोबो कयाँ जैद पाइँए ज़ तोबो येनत जेयुँ थू जैव ताके। हो ताकिन ची डा मनी डारेंतए डायुँर होलाँ तान्या ले। ३ जे स०द कयाँलाई वाज़ तान्या येनर काता ज़ तादोच्यो। बुरू सज़िमिद कयाँकिन छुतलाई ओमान नैदयाव ताके। ४ कयाँए तिर वाज़ दान्या

माःक, प्राइंलाई तान्या येन दाव ताके।

ख्रीस उसज़िम्सिउ

५जे प्राइंए जेयुं येसु ख्रीसए उयुं मिताव ओताक।

६नो भाःकिन ज़ परमेस्वरस तोबो ज़ निलिज़्याव।

ओहक परमेस्वरस तोबो ज़ उलिदी ब नो हकलाई माकमैद,

७ओहकलाई रास्द, रितो ज़ जैसिद, मिं मिन्सिद, परमेस्वरए ओसेवा दान्या जैसिके।

८मिं उमिन्सिउत भन ज़ सज़िम्सिद, सिन्याक पै परमेस्वरए ओपाँ भरी दोक्यो।

बनै दुखस क्रुसत सिन्या ब सहिक्यो।

९है जैद परमेस्वरए नोलाई सोचोइद, स्वर्गताव प्राइंरानी ओमान ल्यो पोल नैक्यो।

मिन भरिरानी प्राइंरानी घ्योःव मिन नैदिक्यो।

१०है जैद स्वर्गतावर, आव नामलावर, तल्ना नामलावर प्राइं ज़

येसुए उमिनत याघूंदानी फुलुप्सिद,

११येसु ख्रीसलाई प्राइंए ज़ 'प्रभु' है दोरिज़्यार।

ननी ज़ परमेस्वर ओबाबुए उमिन ब घ्योःन्या ले।

ज़गै जैज़्याव सोरो मितावर जेलिज़्या

१२जे डायुंलाव डानैं डामेर, डा जेस डालिज़्याकाव जेदोज़्याव मिताव, डा डामालिक मनी भन ज़ नो दैद जेनेज़्याव साःरो जुनीलाई जेयुं थू जैद सुदुमो ताके। १३जेलाई उयुंलाव मिताव येन दाव परींज़्याव ब ओल परमेस्वरए ज़, धामा दान्या युं जैदद्याद सुदुमो परींज़्याव ब ओल परमेस्वरए ज़।

१४है जैद जेदोज़्याव येन भरित मारूमरूमैद माइसिद चावस दोच्यो।

१५हो ताकिन ची जे परमेस्वरए ओज़ार जेखत माल्यो छैवर थ०रिन्या जेले। आव मानुवाताव यायुं बिप्यादा ताःसिउराए खार्ल ब जेलाई सुए ज़ जेपाँःच्या पलेःदद्याधुन्या मालेर। बुरू नितावराए खार्ल चुम चुमोलाई ज़गै जैज़्याव सोरो मितावर रैःन्या जेले। १६जीवनलाव पाँलाई पक्कास

क्योःद जेनैकिन ख्रीस फरी उहुव छचाम जेक्याँताव डादोव येन भरी अनाकलाव ओमाताव ओल्यो लिद डासुनी च्याँःसिरिज़्या। १७ डालाई यासैःनादी ब डाजुनी अनाकलाव तान्या माले। जेजूनी डादोव भरित परमेस्वरलाई डाजिउ डाचरैःव मिताव ज़ तान्या ले। ननी ज़ डा खुसी ताद जेस डारेंज़्या। १८ हिताव ज़ जे मनी आव पाँरात खुसी ताद, डा किताव डारेंज़्या, जे मनी डास रेंचिके।

जेल्योदा तिमोथीलाई डापरींज़्या

१६ प्रभु येसुए उयुँ ओताकिन डा तिमोथीलाई जेल्योदा चाँदो ज़ परींव डापैंज़्या। जेस दैसिद जेथा औरैकिन डायुँ होलाँ तान्या ले। २० जेल्योदा साचो उयुँ थू जैज़्याव तिमोथी स्यासो छुतर डास सु ज़ मालेर। २१ उपुर्कावर ते येसु ख्रीसए ओयेनकिन यायेन वाज़ चिऊज़्यार। २२ तिमोथी ते उगुनर रेंःव, थ०रिउ उलिज़्याव, जे ज़ जेसैंज़्या। डास परमेस्वरए चाव ओथा सथैन्यात ज़ा बाबु स्यासो ज़ गिन्लिज़्या। २३ है जैद डा आव क्योःसिद डालि-ज़्यावल 'डालाई अइ तारिज़्या' लिन्या डासैंवत जेल्योदा हतप्त ज़ डापरींरिज़्या। २४ प्रभुए उयुँ ओताकिन जेल्योदा चाँदो ज़ हुन्या डाले लिन्या आस ब लिज़्या।

इपाफ्रोदितसलाई रेंद सुमो ताके

२५ आव है डालिज़्याव भरी ओमा-ताद ज़ इपाफ्रोदितसलाई जेल्योदा डापरींज़्या। नो डालाई चिऊना जेपरींव मिँ डाभाइ स्यासो ब लिज़्या, परमेस्वरए ओयेनत डानें ब लिज़्या, ख्रीसए उधूँल डास तोबो सिपाई मिताव ब गिन्लिज़्या। २६ खाली नोए जेजूनी 'किताव लिज़्यार' लिद उयुँ थू जैज़्याव। सोनो, जे 'ओजोरो हुज़्या दी' लिन्या जेथैवए 'डासोगोत लिज़्याखेरहो' लिद आतिज़्या। २७ नो जेथैव मिताव ओजोरो ते उहुव ज़। नो ओजोरोए कोज़ाइ ज़ सिके। हाःत ज़ परमेस्वरए उयुँ नाद बाँचैक्यो। ओललाई वाज़ माःक, परमेस्वरए डालाई मनी उयुँ नाके। नो उसिउ ताकिन डालाई सोगोए तर्त सोगो तान्या ओल्यो। २८ है जैद 'नोलाई रेंःद जेयुँर होलाँ घताक' लिद हतप्त ज़ जेल्योदा डापरींज़्या। हो ताकिन डा डायुँ ब होलाँ तान्या ले। २९ नो मिँ प्रभुए उमिनताव ओतावए जेल्योड उहुवत रेंद सुम्यो। आव मिताव मिँरालाई यामान नैदचाव ज़ परिए। ३० काराव ल्यो ताकिन जे डाजूनी दाव जेपैंज़्याव येन सयोःदचान्याए जूनी नो मिँ उजिउए मया मादाद ख्रीसए ओयेनत कोज़ाइ मानी सिके।

परमेस्वरए उयुंलाव मिताव तान्या

३ डानै डामेर, गेप्रभुस तोबो ताद रेंद ज़ लिचिके। डासरो पाँर दोहोरैन्यात डार्च्या मासिए, जेलाई माचावनी जोगोइन्याए जूंनी ज़ लिज़्या। २नो परमेस्वरए ओपाँ बले-ज़्यावरास जोगोइसिद लिच्यो। नोर काः स्यासोर लिज़्यार। नोराए, 'क्यालन्या सरेस जैसिउर वाज़ परमेस्वरए ओथोल ताज़्यार' है यारादोज़्यार। ३खाली परमेस्वरए साचो ओसरेस दैवर ते गे ज़ गेलिज़्या। गे परमेस्वरए उपुरुस दैद उयुंलाव मिताव ओसेवा दाद येसु ख्रीसए ओक्याँत ख्यासिद गेलिज़्यावए गेलाई पाखाताव सतैन्या सरेस माचाही।

४हैदी ब डा मनी, 'डानी ज़ परमेस्वरए ओथोलाव डाताके' है लिन्या ताकिन उपुर्कावराकिन डा भन ज़ है डालिधुखेहो। ५डा हिबू जातलाव, बेन्यामीन थरल जर्मिउ मिं ज़। यहूदीराए याचलन मिताव डाजर्मिउ आथ दिनत क्यालन्या सरेस ब ताके। है जैद जातनी सघ्योःसिन्या ताकिन प्राइरानी घेप्पा जातलाव डा ज़। मोसाए ओकानुन दान्यात फरिसी ज़ डाल्यो। ६'इतावनी ज़ परमेस्वर खुसी ताए सै' लिन्या डम्सिद मन्दलीलावरालाई

क्योःए क्योःए भयालखानाल ब डाराभाःज़्याव। मोसाए ओकानुन भरी ब माबिरैद ज़ डादोज़्याव।

७हिताव येन डादोज़्यावत ज़ ख्रीसलाई दैन्याए जूंनी नो डादाडाव डाकमैव धर्म भरी अनाकलाव थःरैद डारास्के। ८होकिन भन डाप्रभु येसु ख्रीसस सरेस्सिद ओलस सखैसिन्या-किन उपुर्काव येन भरी अनाकलाव ज़ थःरैद, नो डादाडाव डाकमैव धर्म भरी की सीद याख्याज़्याव मिताव ज़ डाख्याके। ९डा है डालिज़्या, तछा परमेस्वरए ओडाक डाच्याँःसिक नो मोसाए ओकानुननी डाकमैव धर्मनी तारँःनावक। बुरू ख्रीसलाई डायुँ उहुबोनी ज़ उयुंलाव मिताव उरँःनावक। १०डा डायुँ ख्रीसस सरेस्सिन्यादा वाज़ लिज़्या। डा डाजूंनी दुखस सिन्या पै सहिद ओयाँव मिताव डा ब होए ओयेनत डासहिधुक, सोनो, परमेस्वरए ओल ओसक्तीनी ख्रीसलाई सिउनी ओसोचोइव मिताव डालाई ब साःरो ओजैनावक। ११इतावनी ज़ ओल सिद सैसिदकाव ओदैव जुनी डा ब डादैधुक।

डा डादोज़्याव मिताव दोव ताके

१२डा चबनै ख्रीस स्यासो साःरो ताद डाखत माल्यो डाताधुके

है डामालिधुइ। हैदी ब डा येसु ख्रीसए ओपैँज्याव मिताव कातानी डासयोःके लिद सैःसिवा जैसिद डादोज्या। १३ डानैँ डामेरं, परमेस्वरए ओपैँज्याव मिताव आःपै ते डामासुदुम्ताए। खाली आव तोबो वाज्र डादोज्या, ताधुव भरी मेंःद हुन्यादा वाज्र डाताकिज्या। १४ किताव बाजी दैन्याए जूँनी धोंःन्यात यादाँजिसिज्याव, हिताव ज़ डा मनी स्वर्गताव बाजी दैन्याए जूँनी परमेस्वरए येसु ख्रीसनी ओरा-खुल्ज्यावदा धोंःनाव ज़ डालिज्या।

१५ है जैद जे परमेस्वरए ओपाँत थ०रिद लिज्यावर मनी जेयुँ नदा ज़ थू जैव ताके। जेनी रूवा रूवार निताव युँ ओमालिकिन परमेस्वरए ओल ज़ जेलाई सम्जैन्या ले। १६ खाली गे परमेस्वरए ओयेन खा पै गेसैँज्याव, हाःपै ज़ दाव ताके।

१७ जे डानैँ डामेरं, डा डादोज्याव मिताव जे ब दोव ताके। गेपैचिउ मिताव येन दोज्यावराए ल्योनी मनी सिऊसिउ ताके। १८ कुधुए ख्रीस कुसत उसिउ है लिन्या पाँलाई सोद बारिज्यार। निताव बारिज्यावराए जूँनी डादाकिन ज़ है दाव ज़ डानैचिज्याव। फरी ब डायुँ घर्द है डादाचिज्या। १९ नितावरालाई नोकसान वाज्र तान्या ले। नोराए परमेस्वरए ओपोल भन जो यायुँनी हुज्या, हो ज़ खिम्ज्यार।

लाज हुन्या येनत भन ज़ खुसी ताज्यार, आव मानुवाताव पाँरादा वाज्र यायुँ थू जैज्यार। २० खाली गे साचो गेफिम ते स्वर्गत लिज्या। हुनी ज़ गेलाई बाँचैज्याव कींद गेनैज्याव गेप्रभु येसु ख्रीसए चिहुसिरिज्याव। २१ उहुव छचाम नो नाम नमलाव लिज्यावरालाई उधूँल ओराभाःव ओसक्तीनी ज़ आव गमे जैसिउ गेक्यारं मनी तोदचाद ज़गैव ओक्याँ मिताव ज़ जैदचासिरिज्याव।

मासखैँज्याव पाँलाई रास्य्या

४ है जैद डानैँ डामेरं, हिताव दैन्या स्यासोर गेतावए परमेस्वरए ओपाँत थ०रिद ल्यो ताके। जेस खर्क दैसिन्या लिद डालाई जेमया बनै लागिज्या। डादोव भरी जेक्याँत ओरैँःवए डायुँ होलाँ ताद डामुनी च्याँःसिउ ज़ लिज्या। २ खाली जिन इयोदिया सोनो सुन्तुखेनिलाई है डादाचिन्ज्या, जिन प्रभुए ओपैँज्याव मिताव खैद लिचिन्के। ३ नँ डास नारिसिज्याव साचो डानैँलाई मनी है डादीज्या, आव मेंमानिलाई निसखैयो। चाव था सथैन्यात नोनी डालाई कुधु सघैनाकिनी। नोनिस क्लेमेस ब ओल्यो। छुतर ब सर्बा ज़ याल्यो। आव भरिराए यामिन अजम्बरी जुनीलाव पोस्तोकोल सर्सिउ लिज्या।

याका दान्या पाँर

४ प्रभुस तोबो ताद एकतार रेंद ज़ लिच्यो। फरी ब है डादाचिज़्या, रेंद ज़ लिच्यो। ५ जे बोमो युँनी जेदोज़्याव प्राइँराए ओसरेस्चिरक। गेप्रभु चाँदो ज़ हरिज़्या तामेंःच्यो। ६ जे व्रीनी फुइ ताताच्यो। बुरू प्राइँत ज़ धन्याबाद चरैःद, जेचाहिज़्याव भरी पोंखारिद ओलस निचिके। ७ हो ताकिन ची जे येसु ख्रीसस सिप जेतावए परमेस्वरनी हुज़्याव सैं ज़ मासैंधुन्या युँ होलाँनी ज़ जेयुँ जेबिचारलाई जोगोइद नैदचान्या ले।

८ अब ते डानैं डामेंर, जो पाँ चाव लिज़्या, जो पाँ थरिउ लिज़्या, जो पाँ साचो, छैंव, ओपाँःच्या माल्यो लिज़्या — नो पाँ असली, उगुन ल्यो उलिकिन जेयुँ होत ज़ थरैव ताके। ९ डा डाल्योनी पैसिद जेदैव पाँर सोनो डा डादोज़्याव भरी किताव जेरेंःव, किताव जेथैव जे ब हितावनी ज़ दोच्यो। हो ताकिन ची गेयुँ होलाँ जैदचाज़्याव परमेस्वर जेस ज़ तान्या ले।

जे डालाई जेमामेंःनाए

१० डाल्योदाडाव खेसो जेयुँ फरी जेजागैवए डायुँर होलाँ जैद

परमेस्वरलाई धन्याबाद डाचरैःज़्या। जे डालाई मेंःनाकेर है डालिज़्याव ते माःक, खाली डालाई सघैन्या मौका जेमादैवए ची। ११ डालाई कातार ओमाथैंनाज़्यावए है डालिज़्याव ते माःक। जो मितावल तादी ब सोन्तोकोस लिन्या पैसिद डाले। १२ डा दुखल तादी ब, सुखल तादी ब, ज़्याद तादी ब, करे तादी ब, ल्योल तादी ब, माल्योल तादी ब, प्राइँल ज़ डालिधुइ। १३ जो मितावल तादी ब परमेस्वरए ओयाँज़्याव ओसक्तीनी प्राइँ ज़ डादोधुइ। १४ हितावत ब डा डादुखल जे जेचिऊनावए चाव ज़ ताके। १५ जे ज़ जेसैंज़्या, डादा जे फिलिप्पीरालाई परमेस्वरए चाव ओथा सथैद माकेदोनियानी डाबाज़्याक डालाई सघैन्या छुत मन्दलीर सु ज़ यामालिज़्याव, जे वाज़ जेल्यो। १६ डा थेसलोनिकेल डालिज़्याव बेलाक मनी डालाई माथैंव मायोःवराल परींदचाव ज़ जेनैके। १७ खाली डा जेल्योनी कातार दैन्या डापैंज़्याव ते माःक, बुरू जेलाई भन ज़ असिक घताक है डालिज़्याव ची। १८ अब ते डालाई चाहिज़्याव भरी प्राइँ ज़ लिज़्या, धोल पोगोल ब ताद ले।

नो इपाफ्रोदितसए उकुइत परींद
जेयाँव भरी डादैके। डालाई परींद
जेयाँव भरी परमेस्वरए उयुँलाव
मिताव ताद ओल परमेस्वरलाई चाव
सी डरो जेचरैःव मिताव ज़ ताके।
१६ डालाई सयोःदद्याज्याव परमेस्वरए
जेलाई मनी माथैँव मायोःव भरिल
येसु ख्रीसए स्वर्गताव ओधननी
ज़ सयोःदद्यान्या ले। २० परमेस्वर
गेबाबुलाई खर्क ज़ माखेन्त्या ज़गै मगै
ओताक। आमेन।

तुपैन्या पाँर

२१ येसु ख्रीसए उमिनत लिज्याव-
रालाई जेरो है यारादोच्यो। डास
लिज्याव डानैराए मनी जेलाई जेरो है
दाचिज्यार। २२ आव सहरलाव ख्रीस
येसुए छैँव उमीं भरी सोनो प्राइँरानी
ते रोमी माहाराजाए उफिमलाव येन
दाज्यावराए जेरो है दाचिज्यार।

२३ गेप्रभु येसु ख्रीसए उयुँ जेल्योदा
ओगराँक, जेयुँल बास ओदोवक।